

→ SUKAN

HOKI PIALA ASIA

BERITA HARI

4/10/2017 p. 9

Shahril harap dapat wakili negara ke Dhaka

Kuala Lumpur: Pakar pukulan sudut penalti negara, Shahril Saabah tetap berharap dapat meraih tempat ke saingan hoki Piala Asia di Dhaka, Bangladesh dari 11 hingga 22 Oktober ini, meskipun skuad negara layak secara merit ke Piala Dunia 2018 di Bhubaneswar, India, tahun depan.

Shahril mengakui, jika terpilih, misi seterusnya adalah untuk membantu Malaysian Tigers meraih tiga penamat terbaik di Dhaka.

Menurutnya, standard skuad negara ketika ini melangkah ke satu tahap lebih baik selepas layak ke Piala Dunia menerusi kempen Separuh Akhir Liga Hoki Dunia di London, Jun lalu.

"Bagi saya, setiap kejohanan yang kami sertai selepas ini perlu sekurang-kurangnya mendapat pingat.

Usaha raih pingat

"Jika dua atau tiga tahun lalu kita dilabel hadir ke satu-satu kejohanan sebagai pasukan pelengkap sahaja, tetapi tidak untuk selepas ini.

"Sebab skuad negara sekarang nampak lebih kuat dan untuk itu jika bersaing di mana-mana kejohanan sekali pun termasuk pada tahun depan, kami perlu berusaha untuk mendapatkan pingat," katanya.

Shahril merujuk kepada beberapa kejohanan besar sepanjang tahun depan, antaranya Sukan Asia dan Komanwel.

Mengulas lanjut saingan Piala Asia, Shahril mengakui dia serta rakan sepasukan sudah bersedia sepenuhnya untuk menghadapi kejohanan itu.

"Selepas kempen kelayakan Piala Dunia, sesi latihan yang diatur jurulatih nampak lebih baik dan keras. Kami semua merasai kelainannya," katanya.

Malaysia diletakkan dalam Kumpulan B bersama-sama Korea Selatan, Cina dan Oman.

Oleh Saiful Affendy Sapran



Shahril Saabah